

LA

no. 28

GENERALE

Et fidelle Relation
de tout ce qui s'est
passé en l'Isle de Ré.

Enuoyée par le Roy à la Royne
sa Mère.

Par le commandement de sa Majesté.



A PARIS,

Chez TOUSSAINT DU BRAY ; rue S.
Jacques, aux Espics-meurs.


M. DC. XXVII.

Avec Permission.

Permission d'imprimer.

IL est permis à Toussaint du Bray Marchand Libraire luré à Paris, de faire imprimer, *la Relation generale de tout ce qui s'est passé en l'Isle de Ré*, enuoyée par le Roy à la Roynne sa Mere, & imprimé par son commandement : Et deffences sont faites à tous autres de l'imprimer, contrefaire, ny alterer, à peine de prison & punition, & de cinq cens liures d'amende. Fait ce 18. iour de Novembre 1627.

Signé, MOREAU.



Auis au Lecteur.

N Et'estonne point, Lecteur, si dans tout ce discours imprimé par le commandement de la Royne Mere du Roy, tu ne vois faire aucune mention de Monsieur le Duc d'Angoulesme, ny de tout ce qui le touche, & sçache qu'ayant luy-mesme composé cette fidelle Relation, comme sçauant qu'il est dedans l'ordre de la guerre, & comme tesmoin de tout ce qui s'est passé en celle-cy, la discretion l'a empesché d'y faire valoir ses bonnes actions, comme il a fait celles des autres sans flatterie.



LE Roy ayant donné la paix à la pluspart de ses voisins, & remedié aux desordres qui sembloient menacer son Estat, sa Majesté croyoit passer vne partie de l'Esté plustost aux exercices de la chasse, qu'aux ouurages d'une guerre inespérée.

Mais comme sa prudence ne se laisse non plus surprendre que son couraige, les aduis venans de toutes parts, qu'il se faisoit vne entreprise contre son Estat, que l'Anglois ancien ennemy de la France, recueilloit ses ambitions appuyées par la rebellion de quelque mauuais François, & d'un pretexte imaginaire de manquement de la foy publique, sa Majesté convertissant toutes ses pensées aux resolutions vigoureuses, d'y apporter le remede par sa propre presence, delibera d'y marcher vers les Prouinces qui pouuoient estre les plus menacées.

Toutesfois la suite des resolutions dependant d'une puissance superieure, pour le mal-

heur de cét Estat, & neantmoins pour la gloire du Roy. Dieu permist que sa Majesté fust atteinte d'une grande maladie, d'où il y avoit plus à craindre qu'à esperer, si sa Majesté préférant le bien de ses subiects à son propre salut, dans les excez de sa maladie, n'eust vigoureusement donné les soins & les commandemens, pour s'opposer aux desseins que les ennemis faisoient pour se servir de son esloignement, & prendre telle part dans ses Estats, qu'il eust esté difficile de les en pouvoir chasser.

Sa Maïesté estoit secondée des bonnes intentions de la Royne sa Mere, & des tres-generaux conseils de Monsieur le Cardinal de Richelieu, duquel, sans flatterie, l'on peut dire que résistant à tous les partis qui luy estoient proposez d'une paix plausible selon le temps, mais desadvantageuse à l'advenir voyant son maistre malade, quelques-vns des Grands esloignez, & chacun soupirant après vn accord, il a mieux aymé courir fortune de sa propre perte, que relascher rien qui feust contraire à la dignité du Roy, & au bien de cét Estat.

La descente donc des Anglois estant faite le 22. Juillet en l'Isle de Ré en nombre de huit mil hommes: Le premier combat y ayant esté très-hardy, les ennemis ne laissant pas d'y prendre terre, le sieur de Toiras qui avoit combattu comme vn soldat, iugea très à propos qu'il falloit user d'autant de prudence pour conserver la place, comme il avoit eu de coura-

ge pour empescher la desc^e ente: Et de fait com-
mençant vn traieté sans e^ffect, mais à dessein, i
l'a tousiours continué au ec tant de dexterité
qu'il a obligé les ennemis à croire qu'il estoit
plus prest à se rendre qu'à se seruir du temps
pour ruiner leur entreprise.

De dire les soins que sa Majesté a apporté
pour le secourir, les marques en sont tres-veri-
tables, l'entrée de plusieurs barques le tesmoi-
gnent assez, les despences qu'a fait faire ledit
sieur Cardinal de Richelieu par les ordres &
commandement exprés de sa Maiesté, font
voir comme il n'y auoit rien d'espargné, les vi-
gilances de M. de Mende, & les soins de l'Abbé
de Marillac par son commandement, les trou-
pes qui ont esté fournies pour cét effect: le par-
ticulier commandement qu'il donna au sieur
de Queusac de venir de Paris pour seruir à
l'embarquement des trente-cinq barques, d'ot
par la resolution & presence dudit de Queusac
il en entra vingt-huict, & les Pinasses que l'on
a enuoyé chercher iusques en Bisquaye, où le
Comte de Gramont a tesmoigné son credit &
sa fidelité, donnent des preuues certaines que
rien n'a esté obmis pour secourir & la citadel-
le, & la personne du sieur de Toiras qui merite
beaucoup.

Mais toutes ces choses estoient ouurages
inutiles, si Dieu n'eust redonné à la France la
santé de son Roy: Car encore que la proposi-
tion du grand secours eust esté faite, comme iu-

gée la plus capable de chasser les Anglois, toutesfois c'estoit vn coup de maistre de hazarder toutes les forces de l'Estat à la mercy des Elements sans raison, voir vne ville rebelle vnée avec la faction estrangere, desgarnir toutes les entrées de la grande terre pour aller secourir vn fort à demy perdu, faire vne descente à la veue d'une armée puissante, encor que le conseil en fust hardy, & appuyé de raisons probables, toutesfois sans la venue du Roy l'exécution ne s'en pouuoit faire.

Sa Maiesté donc voulant secourir & son Estat & ses seruiteurs de sa propre presence, resolut demy guarly de donner sa personne à ses armes, & son courage à ses entreprises.

Son arriuée releua toutes les pensées de son armée à ce seul dessein de servir, sans auoir esgard ny aux necessitez qui accompagnent les Prouinces où la guerre est depuis sept années, ny de l'entrée d'une saison en laquelle les maladies sont ordinaires, & que les mauuais tēps entretiennent, les gardes penibles ne faisoient plus murmurer la soldatesque, & chacun prenant plus de plaisir à servir qu'à se plaindre, tous à l'enuy brusloient de desir de voir les ennemis pour les brusler de la bouche d'un mousquet, ou les percer de la pointe de leurs espées.

Le Roy qui voyoit dans le visage de ses seruiteurs vne telle ardeur de biē faire, qu'il sembloit rien ne leur estre impossible, apres auoir eu d'eux si heureux succez du secours des deux
forts

forts à la veille qu'ils se deuoient rendre, ses actions estant toutes iustes espera de la grace de Dieu que la suite du plus hardy dessein que iamais Monarque aye fait luy succederait.

Ce fust lors que resoluant le grand secours de toute l'Isle pour en chasser les Anglois, M. le Marechal de Schomberg l'ayant pressé de luy donner la charge de ce secours, sa Majesté luy accorda, luy baillant le sieur de Marillac pour Marechal de Camp.

Qui n'a veu lors les soins du Roy n'e scauroit cōprendre les executiōs, sa Majesté choisissant les troupes soldat à soldat, les Maistres de cāp, les Capitaines, & tous les Officiers faisoit ceste action avec vn tel iugement, qu'il estoit aisé à attendre que ce dessein luy deuoit reüssir.

Les lieux de l'embarquement estant resolus le Roy ordonna à M. le Cardinal de Richelieu d'aller en Oleron, où sa presence donna tel ordre qu'e deux iours il y eust des vaisseaux pour y embarquer les Regimēs de Nauarre, du Plessy Praslin, & de la Milleraye, qui estoit ce que S. M. auoit destiné pour passer avec le sieur de Marillac avec 50. des gensdarmes de la Royné Mere de S. M. & la cōpagnie du sieur de Buffi Capitaine de caualerie, le tout fourni de viures.

Cependant S. M. avec des vigilances incomparables enuoya l'ordre aux sables d'embarquer six cens homes de Vaubecourt & de Ribérac, & le regiment de Dufren d'Urbeliere avec 50. gendarmes de la compagnie de Monseigneur le Duc d'Orleans, cōduits par le sieur de

la Ferté, & la cōpagnie de cheuaux legers du S.^r de la Borde, avec ordre au S.^r. Eueſque de Niſmes, & Abbé de Marſillac, pour y tenir la main, & cōmādement au Capitaine Richardelle bon homme de marine, de mettre toute la flotte de vaiſſeaux iuſques au nombre de 52. en eſtat de faire ce ſeruice, M. le Cardinal ayant par le commandement du Roy pourueu au payement de toutes les deſpēces de cēt embarquement, il n'y auoit plus que le vent à deſirer.

Et par ce que le Roy auoit iugé par ſa propre veuë que le paſſage du plomb eſtoit le plus facile, eſtāt celuy là qui ſe pouuoit faire en moins de temps, le Roy voulut que les 800. hommes choiſis du regiment de ſes Gardes, ſix cēt hommes de Beaumont, & quel que reſte de barques relai chées, a cauſe du mauuais temps, avec cinquante des gens d'armes de S. M. & cinquante cheuaux legers de ſa Garde, & ſes Mouſquetaires fuſſent embarquez pour paſſer au fort de la Prée.

Ces trois eſpèces ſeules eſtoient d'hōmes ſi choiſis, qu'elles euſſent eſté capables de combattre le double de ce qu'elles eſtoient, & les Mouſquetaires ſeulement en tel eſtat, ſa Maieſté ayant fait prendre a trente-deux des armes à preuie, & des haliebauts, qu'il n'y a point de front de bataillon, qu'ils n'eſſent eſté capables de percer iuſques à la quene.

La Nobleſſe de la Cour venant à la foule prendre congé de S. M. l'on voyoit dans leurs viſages vne telle gayeté, qu'il faut aduoier

n'estre permis qu'à la nation Françoisse d'aller si librement à la mort pour le service de leur Roy, ou pour leur honneur : que l'on ne scauroit remarquer aucune difference entre celui qui la donne, & celui qui la reçoit.

Tous ces ordres donnez, le Roy de sa propre main fist ceux du combat, & en trassa les desseins en plusieurs sortes, afin de s'en servir selon la situation des lieux où la disposition en laquelle les troupes ennemies seroient.

Et parce que toute ceste entreprise devoit des vents, S. M. ayant separé ses embarquemens en plusieurs lieux, auroit destiné le sieur de Marillac pour passer du costé d'Oleron, avec ce que M. le Cardinal y auoit préparé, & M. de Schomberg estant destiné de passer au plomb. Il auoit esté resolu qu'il attendroit que le premier embarquement seroit passé, & par le retour des mesmes vaisseaux, qu'il passeroit avec les Mousquetaires, les volontaires, & cinquante chevaux legers de la garde de sa Majesté.

Mais l'ardeur d'arriuer, ou son affectiō à bien servir, & son courage à se voir l'espée à la main contre les ennemis, luy fist changer ce dessein que l'on peut dire auoir esté contre les sentimens de S. M. De sorte que ledit sieur de Schomberg prenant la route de Broüage avec les Mousquetaires & les volontaires, trois cens hommes de Piedmont, & autant de Rembures estant desia passez avec le sieur de Marillac, il

arriua à Marennes, Bourg entre Broüage & Oleron, mandant à M. le Cardinal qu'il le prioit de vouloir luy enuoyer des barques pour passer toutes ses troupes. Cela surprint ledit sieur Cardinal, & comme ses iugemens sont tousiours suiuis de l'effect qu'il s'est proposé, il creust que ceste grande luitte de Noblesse empescheroit ledit sieur Mareschal d'exercer si promptement son dessein: Toutesfois faisant vne diligence admirable, redoublant & ses vaisseaux & ses viures, il en trouua assez pour embarquer le tout: De sorte que venant vn vent propre, & le trajet se pouuant faire à vne marée, & à moins, tous les vaisseaux estans à flot, & le sieur de Marillac à la teste, avec ordre dudit sieur de Schomberg, de ne passer pas sans luy, d'où il arriua que la barque dans laquelle il estoit, se trouua si surchargée, & de Noblesse, & d'autres incommoditez suruenües par ladite Noblesse, que ne pouuant se mettre à la mer, ledit sieur de Marillac fust obligé de suiure le commandement, & relascher.

Cependant sa Majesté ne perdoit point de temps, car enuoyant à M. le Mareschal de Bassompierre commandement de faire embarquer tout ce qui estoit au plomb, & à M. du Halier Mareschal de Camp de le seconder: Le tout fust fait si heureusement, que des troupes qui estoient au plomb, il y passa douze cens hommes de pied, & trente cheuaux des gensdarmes du Roy, avec des viures & des

munitions de guerre, & trois petits canons. L'ordrey fust tres-bon, & S. M. en demeura tres-satisfaiçte, laquelle en mesme temps enuoya ses mulers, pour faire apporter cent mille pains qu'elle auoit fait faire à Maran, avec vne tres-grande prouision de foin & d'auoine pour la caualerie.

À l'arriuée de ce secours les ennemis estans aduertis de leur passage, se resolurent de les venir attendre à la descente, & de faiçt s'y trouuerent avec deux mil hommes choisis, & six vingts cheuaux.

Le sieur de Sainct Preuil, duquel les serui-ces depuis l'attaque de la citadelle, iusques à la deffaiçte des Anglois sont dignes de loüanges, ayant recognu les troupes Angloises en vint aduertir M. de Canape, qui commandoit tout l'embarquement comme maistre de Camp du regiment des Gardes. Mais ne laissant pas de passer outre, sans suivre le conseil que luy donna Sainct Preuil, qui estoit d'attendre au iour à faire sa descente, parce que les canons du fort de la Prée l'eussent fauorisé, & chassé les ennemis: Le bruit de la descente estant entendu par eux, donnerent, mais si laschement, que trouuant les nostres sans ordre, s'ils eussent poursuiuy leur pointe, il est à craindre que le combat eust esté desaduantageux, ou au contraire, les sieurs de Fourille, de Porcheux, & de Malicy, assistez de Mansan, Rousseliere Lieutenant, Sumesan Enseigne, & quelques Sergens avec deux cens hommes for-

merent vn bataillon, avec lequel affrontant les ennemis, ils en tuerent plus de cent sur la place, & quantité de blesez, quasi tous François rebelles, ayant pris la teste pour seruir à ceste action.

Le lendemain la canalerie Angloise en nombre de soixante, venant fondre sur quelques soldats desbandez, entre la flotte & le fort de la Prée, les trente gendarmes monterent à cheual, douze desquels venant aux mains avec les ennemis, en tuerent sur la place, en prirent cinq, & amenerent sept cheuaux. Cét exploit, quoy qu'il fust petit, seruoit toutesfois grandement, puis qu'il ostoit le courage aux ennemis, & donnoit vne creance aux habitans de l'Isle, que les armes du Roy y estoient puissantes: & de faict, il arriua que plusieurs personnes de la flotte, & de Sainte Marie vindrent apporter des nouuelles au sieur de Beaumont que les ennemis s'embarquoient.

La nouuelle du passage du sieur de la Melheraye resiouyst le Roy & toute la Cour, parce qu'ayant heureusement succedé, il estoit aisé à voir que ce passage estant possible, cela eschaufferoit vn chacun à faire la mesme chose.

Le Roy qui estoit aduertý de l'heureux passage du plomb, que l'on peut appeler le sien, & des occasions qui se passoient dans l'Isle toutes à l'aduantage de son seruice, scachant que M. de Schomberg n'auoit pas passé, donnoit les iournées aux soins de conduire son entreprise

iusques à la fin, & les nuits S. M. auoit tant d'inquietudes, que ses seruiteurs demeuroient dans la peur, que cela n'alterast sa santé.

Et parce que le vent n'estoit pas propre pour Broüage, S. M. delibera de renuoyer querir le sieur de Marillac, & ses Mousquetaires, estant necessaire d'auoir vn homme de commandement dans l'Isle, & desirant que la compagnie desdits Mousquetaires passast au plomb pour participer au bon-heur, ou au hazard de ce qui arriueroit à ce qui estoit desia passé.

Les desirs de M. de Schomberg estoient cependant de surmonter toutes les incommoditez de la mer, & commander avec souueraineté aux vents, comme au Roy de faire passer le sieur de Marillac, & ses Mousquetaires.

La fortune fust esgale, les volontez du Roy furent accomplies, Marillac passa avec vingt volontaires, vingt Mousquetaires de chapes, & sa personne, & sa Majesté allant au plomb donna vn tel ordre, que toute l'Infanterie qui estoit en nombre de quatre cens hommes, les Mousquetaires & les vingt-cinq gensdarmes passerent, donnant tel ordre, qu'à Moran toutes provisions pour vn mois fussent portées au fort de la Prée, cōme M. le Cardinal qui auoit fait faire quatre cens mille pains à Broüage pour subuenir quatre-septaines à la nourriture de tout ce qui estoit passé.

Quelques-uns iugeoient que la décision de ceste entreprise ne cōsistoit au plus qu'en huit iours, & la principale de leurs raisons estoit

fondée sur ce que le Bouquiquan depuis l'arrivée du sieur de Canape avoit fait donner un assaut general à la Citadelle ou n'ayant fait aucune bresche c'estoit plustost vne marque de desespoir que de resolution: Et que ceste entreprise de vanité devoit estre suivie d'une retraite. Sur cela, il feust dict au Roy que le Duc de Bouquiquan estoit homme pour ne sçavoir ny combattre ny fuir, les esprits neantmoins estoient en suspens, & la plus-part des hommes presageans le mal non pas pour le desirer dans le general de l'Estat. Mais par une envie de changement aux choses presentes, s'ennuyant de ce qu'ils voyoient, croyant que l'advenir leur sera plus profitable, faisoient des pronostiques contraires à ce qu'ils doivent & mesmes au sens commun.

Tout cela n'empescha pas que Monsieur de Schomberg surmontant & le vent & la tourmente ne se mist en mer, aymant mieux essayer sa perte que de manquer au commandement qui luy estoit fait.

Il feust fort secondé de tous ceux qu'il avoit avec luy. Mais les sieurs Commandeur de Vallancé & de Queusac doivent avoir une particuliere part à ce passage. Le premier l'avoit proposé dès le commencement de la descente des Anglois, & celuy-cy fortifia la resolution, & conduisit ce secours de vingt-huict barques où son courage & son affection parurent avec chaleur.

Estant.

Estant ledit sieur de Schomberg à la mer, il fallut aller chercher le vent & la maree: & le Capitaine Renier bon Pilote conclud d'aler eschoier à la mer sauuage, dans vn port nommé Chauueau, vis à vis de sainte Marie, où ledit sieur de Schomberg auoit donné ordre, par le commandeur de Vallace, qu'il auoit enuoyé deuant avec vne chaloupe au fort de la Pree, qu'il luy fist vn signal, si audit lieu de sainte Marie il n'y auoit point d'ennemis logez.

La descente y fut tres-heureuse & sans hazard: Toutes ces troupes en terre sans auoir mouillé le pied, ledit sieur de Queuzac opina qu'il falloit aller droit à la Pree & aduertir ce qui y estoit de se tenir en bataille, à fin de marcher & surprendre les ennemis, qui ne pouuoient auoir aduis de ceste nouuelle descente. Pour cét effect offrit d'aller à ce fort, fondant son opinion que si les ennemis gardoiēt la flotte il seroit aisé de les emporter, sinon, & qu'ils fussent retirez à S. Martin, que leurs retranchemens n'estans que d'une simple ligne ils ne la pouuoient deffendre, & par consequent que la Citadelle seroit secourue du costé de la mer.

Il fut en partie creu, car Monsieur le Marechal marchant droit à la Pree, aduertit toutes les troupes par vn de ses gardes de son arriuee, & qu'il desiroit les trouuer toutes en bataille.

Le sieur de Marillac qui y estoit arriué le iour auparauant executa ce commandement, de sorte que ledit sieur Marechal trouua toutes les troupes prestes à marcher: Mais il voulut co-

mencer sa iournee donnant à Dieu les premiers vœux de son cœur pour laisser le reste au seruice de son Roy & de son honneur.

Après donc auoir fait vne priere generale, ledit sieur de Schomberg commanda audit sieur de Marrillac de prendre toute la cauallerie, & de s'aduançer entre la flotte & S. Martin, à dessein de tailler en pieces ce qu'il y auroit de troupes à la flotte, sinon de voir la contenance des ennemis, soit dans les retranchements, soit au deuant s'ils estoient resolus de venir au combat.

Cependant il fit suiure l'infanterie, qu'il disposa en douze bataillons, & de ce pas marcha droit aux ennemis en intention de leur faire leuer le siege, comme estant plus l'aduantage du seruice du Roy, que de hazarder vn combat general, où il y auoit autant à perdre qu'à gagner.

La caualerie ayant fait ce qui luy estoit commandé, & ledit sieur de Marrillac personnage de iugement & d'action, voyât la caualerie des ennemis en bataille, entre les moulins de S. Martin & le bourg faisant tres-bonne mine, il creut que l'infanterie des ennemis estoit encore dans ledit bourg.

Mais le sieur de Toiras, ayant fait sortir six ou sept cents hommes du regiment de Champagne, à dessein d'emporter leurs trauaux à la faueur de nostre armee, trouuant les ennemis deslogez, il print le temps de venir à nostre caualerie, pour aduertir de leur retraicte & don-

ner hardiment ses conseils qu'il n'y auoit qu'à aller à eux pour les desfaire.

Cét aduis estoit genereux, mais la reputation des armes est si chere, qu'il n'est pas permis à vn sage general, de hazarder vn combat sous la seule voix d'une personne : cela obligea M. de Schomberg de tenir conseil, & cependant il fut ordonné par l'aduis du Commandeur de Vallance, au sieur de Buffy d'auancer sa compagnie pour considerer l'estat des ennemis, voir l'ordre qu'ils tenoient & les chemins où ils pouuoient s'acheminer, soit pour combattre, soit pour se retirer.

Dans ce conseil les aduis furent differents, la plus petite voix fut de hazarder vne bataille, la plus grande, disoit qu'il falloit faire vn pont d'or à ses ennemis, & se seruant de plusieurs exemples, celuy d'Amiens y fut rapporté. Baste qu'apres plusieurs agitations, il fut resolu de suiure les ennemis, & de ne rië hazarder si l'occasion n'en fournissoit le moyen, & que l'assurance de la victoire ne fust plus grande que l'incertitude. Ceste resolution fut suiue par l'espace de deux heures en vne lieuë de chemin, & le sieur de Marillac tousiours à la teste de la caualerie, poussa huiët ou dix fois les ennemis leur faisant lascher le pied.

Mais comme il ne pouuoit estre suiuy de l'Infanterie, & celle des Ennemis soustenant deux esquadrons de leur Caualerie. Aussi n'estoit-il pas raisonnable de faire vne charge en-

tiere crainte, d'engager vn combat des-avantageux.

Cela se passant entre le Bourg S. Martin & la Couarde, le Sieur de Toiras y voyant les Ennemis s'y retirer sans vne notable perte, se souuenant de celle qu'il auoit receüe aux personnes de ses deux freres, rejoignant pour la deuxiesme fois M. de Schomberg, proposa de nouveau qu'il falloit engager les Ennemis en vn combat.

Cela fit tenir vn nouveau conseil, duquel M. de Marillac y deuant estre M. de Schomberg fust obligé l'enuoyer querir: Toutes les raisons debatues, il fut conclud que les Ennemis sortant de l'Isle, c'estoit remettre les affaires de sa Majesté en mesme estat que s'ils estoient de faits; Et M. de Schomberg tres-prudemment dict tout haut: Qu'il preferoit le seruice de sa Majesté à ses interests particuliers, Que toute sa gloire estoit de combattre, Que ses desirs le portoient à ce dessein. Mais les raisons de l'Estat l'obligeoient à les chasser aussi tost qu'à les defaire, l'vn estant plus seur que l'autre, qu'il falloit prendre le party de l'aduantage du seruice pour laisser celui de sa propre passion.

Cela donna du temps aux Ennemis de s'esloigner, & de prendre vn lieu aduantageux à la teste du village de la Couarde pour presenter vne apparence de bataille; & cependant favoriser leur retraite.

Leur ordre fut de mettre leur Caualerie

à nostre teste en deux esquadrons , & leur Infanterie en deux bataillons, avec quelques pelotons de Mousquetaires, pour fauoriser leur Caualerie.

Dans la premiere teste de l'un de leurs bataillons à l'entree dudit village, ils faisoient paroistre tous leurs drapeaux pour couvrir leur retraite par ceste faulx apparence, & donner moyen à leur Infanterie de filer, sans estre combatuë.

Le Sieur de Marillac se doutant de ceste ruse & voulant en apprendre la verité par sa propre veuë, porta le petit esquadron de Bussy jusques aux premieres mousquetades, desquelles voyant vne grande descharge, il ne pouoit croire autre chose sinon que les Ennemis estoient logez dans ledit Bourg : & à la verité c'estoit le mieux qu'ils pouuoient faire, & d'y attendre la nuit à la faueur de laquelle ils pouuoient se retirer & sans perte & sans desordre.

Les Ennemis ne choisissant pas ce party, ils continuerent leur retraite, de laquelle les paisans dudit Bourg venant aduertir ledit Sieur de Marillac, son aduis fut de les suivre : mais il y eut difference d'opinions par quels chemins cela se devoit faire, soit par dedans le village, soit par le dehors, disans, qu'il y auoit marais des deux costez, & que le pays estoit inaccessible, particulierement pour l'Infanterie qui n'y pouoit passer sans mouiller le pied. Le Sieur de Toiras se trouuant là decida la

question, disant : Qu'il asseuroit vn passage tres-bon à la main droicte, n'appuyant pas son opinion comme soldat ny Capitaine, mais comme habitant de l'Isle qui en scauoit tres-bien les chemins. Cela fut cause que la Cauallerie suiuant cest aduis, esuita le village : mais l'Infanterie passa à trauers, d'où il s'ensuyuit que les Ennemis eurent du temps pour s'esloigner, comme il est facile à juger, puis qu'un grand corps en vn lieu estroit demeure longuement à y passer, quand mesmes il n'auroit à marcher qu'à la file.

Les Ennemis cependant remirent leurs troupes en bataille à la teste des dunes, & proche d'une maison où leur Cauallerie auoit vn espace de quelque quatre cents pas.

Le Sieur de Toiras continuant de presser le combat, dit, Qu'il falloit ou les laisser aller ou les combattre en ce lieu là, n'y en ayant plus qui fust propre pour venir aux mains.

L'Infanterie demeurée derriere c'estoit vn sujet de ne les point attaquer, n'estant pas raisonnable de hazarder le combat avec la seule Cauallerie : Cela fut suiuy d'un commandement de faire aduancer quelques mousquetaires, lesquels estans conduits par le jeune Droué, quoy qu'en petit nombre, commencerent d'attaquer les Ennemis si viuement dans vn chemin estroit, entre la digue & la dune, qu'elle leur fit tourner les espaules : Et nostre Cauallerie allant à celle des Ennemis, Bussy les pressa de si pres qu'il luy fit prendre

la fuitte, d'où il arriua que se renuersant sur leur Infanterie, toute l'Arriere-garde des Ennemis fut mis en fuitte, dans laquelle la peur les faist, de sorte que voulant éuiter la mort par la force de nos armes, ils la trouuerent dans vn Element bien plus impitoyable, qui estoit l'eau, où il s'en noya vne telle quantité que le nombre en est plus grand qu'il ne paroist. Les nostres suiuirent ceste victoire jusqu'au delà d'un pont que les Ennemis auoient faict quelques jours deuant en vn passage qui s'appelle, l'Isle de Loye, qui n'est separé de celle de Ré que par le flux & reflux de la mer.

M. de Schomberg voyant qu'il luy estoit succédé ce qu'il pouuoit desirer pour l'aduanrage du seruice de sa Majesté, commanda la retraite, laissant deux Regiments pour conseruer la teste des dunes & mettre en seurété quelques blesez qui furent portez à vne maison proche où se fit ceste desroutte, dans laquelle il est tres-vray que les Anglois ont perdu plus de quinze cents hommes morts sur la place, six à sept cents prisonniers. Entre les morts, Carle Rich frere du Comte de Holland, son Lieutenant Colonel, le Cheualier Alexandre Colonel & cousin de Bonquinghen, le Colonel Halé, le Colonel Byngleys, le Colonel Conrihain y sont demeurez. Outre, quantité de Capitaines & force Officiers, & le Lieutenant de la Caualerie. Pour les prisonniers Milor Mon-joy, Grais Escossois Colonel de leur Artillerie, trente-cinq Capitaines, plu-

seurs Officiers, & le frere du Cheualier de la Chaise. Il y a quatre pieces de campagne de prise & quarante-six enseignes, desquelles l'une & la premiere a esté prise par le Sieur de Beringuen.

Du costé du Roy Porcheux Capitaine au regiment des gardes, & tres-vaillant homme, a eu vne cuisse cassée, Vilquier vne mousquetaire au trauers le corps, mais sa blesseure est sans danger, le General des galeres vn coup de pistolet de deux bales, l'une à l'espaule & l'autre au bras, quelques autres blesez legerement & huiet à dix soldats morts.

Du depuis les ennemis ont tout à fait quitté la terre, de sorte qu'il y a plus d'apparence de leur retraicte pour conseruer leurs costes, que de dessein d'entreprendre sur cet Estat.

C'est sans adiouster rien à la gloire du Roy que ceste entreprisede a esté faicte par sa resolution, conduite par son iugement, & executée par sa bonne fortune.

Il faut esperer que sa Iustice marchant tousiours à la teste de ses armées, & toutes ses actions estant soustenuës de la grace de Dieu: Ce Monstre ancien de Rebellion, seruira d'exemple, d'un chastiment tel que leurs arrogances le meritent.

F I N.